

viel teil/in welche alle zechen/als ein körper geteilt seindt. Ein jetlichs par aber pflegt alle tag wan die heuwer arbeitendt/die grüben eines teils/denen der vorsthet/zübesichtigen/mitt welcher weiß gwonlichen gschicht/das mann innert halbvierzehen tagen alle teill der grüben besichtiget. Sie besähen aber vnd betrachten alles in sonderheit vnd berahtschlagen sich mitt dem steiger / von der hauwung/gezeugen/gebeuwen/vñ von allen anderen dingē/die zü dem bergtwerck gehörendt:zun zeiten verdingendt sie mitt sampt dem steiger/den bergt-heuweren etliche lachter eines gangs zü hauwen / vmb ein grossen oder kleinen lohn/nach dem das gstein vest oder lindt ist/sampt den gängen. Aber so den selbigen so vmb lohn die lachter zü hauwen haben angnomē / ein solche veste des gsteins für kommendt/deren sie nicht verhofft noch versähen haben/vñnd von dessen wegen die arbeit harter vnd langsamer von ihnen vollbracht/so machen sie jnen grössere bsoldung / so aber noch der angfangnen arbeit das gstein von wegen des wassers / nicht so vest ist/vnd die arbeit leichter vnd geringer gschähen mag/so brechen sie jnen etwas vom lohn ab. Ober das so die gschwornē die steiger oder bergt-heuwer offentlich ob der fahrlässigkeit oder betrug ergriffendt/so ermanendt sie die selbigen erstmalen/jres ampts/das sie treuwlich solten außrichten/oder schelten sie/darnach wan sie nicht fleissiger noch frömmer wordē seindt/so bringendt sie dasselbig für den Bergtmeister / der sie nach seinem gewalt jhres ampts entsetzet/oder so sie ein laster begangend in die gefengtnuß würfft. Zülest im abwesen der gschwornen die im als rhat vnd mitgehülffe zü geben seindt/bestätiget der Bergtmeister kein recht zü den grübē/marscheidet auch nicht die grübē/vñ setzet derē keine marzil/zerlegt auch nicht den gspan so von den marchen entstanden/spricht keine recht/vnd höret auch kein rechnung. Der Bergtschreiber aber verzeichnet alle zechen in die bücher / in das ein aber schreibt er die neuwen/in das ander die alten zechen / so widerumb erneuert seindt. Dis geschicht aber auff dise weiß. Erstmalen zeichnet er seinen nahmen/der das recht zü grüben begert hatt / darnach an welchem tag vñnd stundt er solchs begärt/als dan den gang vñ das ort darein d gang ligt / itē in wasserley gestalt im das recht zü grübē gebē seye/zum letsten/an welche tag der Bergtmeister dise grüben habe bestätiget. Es wirt auch disem/der das recht zü grüben hat/ein zedel gebē/darein solche ding alle begriffen seindt. Ober das/einer jetlichen grüben/dessen recht ietz bestätiget ist/schreibt er die gwercken in ein ander büch/auch in ein anders die vnderlassung der schichten/die einem jettlichen vom Bergtmeister auß gwüssen vrsachenn zügelassen seindt/in ein anders das gelt/welchs ein grüben der anderen das wasser auß züfürē/oder die gebeu w zü machen/dargibet:in ein anders büch/die sachenn die vom Bergtmeister vñnd den gschwornē erkendt/vñ die gspan / die vō jnē als ehrliche scheidtleut zerlegt seind/dise ding alle in sonderheit/bringt er in die bücher alle wochē / am Mittwochē. Wan aber am selbigē tag/ein feyrtag ist/so thut er dasselbigē den nächste dorstag / alle Sonabēdt aber verzeichnet er in ein büch die summa/die man die vergangne wochē hat auß gebē/welcher rechnung ein jeder steiger gebē hatt. Die summa aber/so ein jeder steiger in dreie monate hatt außgebē/bringt er zü seiner zeit in ein sonderlich büch/auch in ein anders büch die gewerckē/welche in die retardat seindt kōmen. Weiter/auff das nicht einer dz laster der verfelschüg möge beghehen/so werdē alle dise bücher/in ein kasten verschlossen vñ mitt zweie schlossen verwart/welcher schlossen schlüssell/einen d bergtschreiber/dē anderē aber d Bergtmeister hat. Der gegensreiber aber einer ietlichē zechē/verzeichnet alle gwercken ins büch welche d erst außrichter des gangs anzeigt/vñ die kaffer d teilen setzet er allwegē an statt d verkaffer/dahar es gschicht dz zun zeiten zwenzig gwerckē/od mehr einerley guggis/bekōmen habendt. So aber d verkaffer nicht vorhandē/od brieff an bergtschreiber mitt seinē sigell verzeichnet gschickt hatt/vñ sonderlich wan sie nicht mitt dē sigell des schuldthessen der

in disem